



Broj: 01-01-50-589-2-I/06  
Sarajevo, 28.07.2006. godine

Na osnovu člana 25. stav (2) Zakona o konkurenciji ("Službeni glasnik BiH", broj 48/05), Konkurencijsko vijeće na 32. sjednici održanoj 28.07.2006. godine je razmotrilo zahtjev Regulatorne komisije za električnu energiju u Federaciji Bosne i Hercegovine (FERK), zaprimljen pod brojem: 01-01-50-589-1-I/06 dana 19.07.2006. godine, za davanje mišljenja na Nacrt Pravilnika o kvalifikovanom kupcu u pogledu usaglašenosti sa odredbama Zakona o konkurenciji, i po istom daje sljedeće

### **MIŠLJENJE**

Nacrt Pravilnika o kvalifikovanom kupcu Regulatorne komisije za električnu energiju u Federaciji Bosne i Hercegovine je usaglašen sa odredbama Zakona o konkurenciji.

### **O b r a z l o ž e n j e**

Regulatorna komisija za električnu energiju u Federaciji Bosne i Hercegovine (u daljem tekstu: FERK) je podnijela zahtjev Konkurencijskom vijeću za davanje mišljenja na Nacrt Pravilnika o kvalifikovanom kupcu.

Nadležnosti FERK-a, regulisane članom 14. Zakona o električnoj energiji ("Službene novine FBiH" broj 41/02, 24/05, 38/05), obuhvataju i nadzor i regulisanje odnosa između proizvodnje, distribucije i kupaca električne energije, uključujući i trgovce električnom energijom.

FERK prema predmetnom Zakonu je obavezan da reguliše tržište električne energije na način, kojim će osigurati jednakopravne odnose između svih učesnika, da štiti prava kupaca, elektroprivrednih društava za distribuciju i proizvođača električne energije, onemogućiti stvaranje monopola u elektroprivrednoj djelatnosti, stvori uslove za konkurentnost i time omogućiti postizanje razumne ravnoteže između ponude i potražnje električne energije.

Predmetni Zakon o električnoj energiji definiše kvalifikovanog kupca kao svakog kupca koji ima godišnju potrošnju električne energije veću od potrošnje utvrđene posebnim kriterijima FERK-a i kojemu je dozvoljeno da električnu energiju kupuje slobodno po svom izboru. Status kvalifikovanog kupca stiče se u skladu sa Zakonom o prenosu, regulatoru i operatoru sistema električne energije u Bosni i Hercegovini ("Službeni glasnik BiH" broj 7/02) gdje su definisani obim, uslovi i vremenski raspored otvaranja tržišta. U provođenju predmetnog Zakona, kao i DERK-ove Odluke o obimu, uslovima i vremenskom rasporedu otvaranja tržišta električne energije u Bosni i Hercegovini, FERK je pripremio Nacrt Pravilnika o kvalifikovanom kupcu.

Primjena ovog Pravilnika, odnosno njegovih pojedinih odredbi, treba da omogućiti postizanje ciljeva koji su FERK-u postavljeni Zakonom o električnoj energiji, odnosno uključivanje u međunarodno tržište električne energije i uvođenje konkurencije, kao i zaštita općeg javnog

interesa, te stvaranje uslova za racionalan i ekonomičan razvoj elektroprivredne djelatnosti na prostoru Federacije Bosne i Hercegovine.

Konkurencijsko vijeće smatra da predmetni Pravilnik kvalifikovanom kupcu omogućava odabir više snabdjevača, i u tom cilju treba preciznije utvrditi rokove za ispunjavanje tehničkih uslova mjerenja isporučene električne energije (član 12. stav (2) Nacrta predmetnoga Pravilnika).

Konkurencijsko vijeće smatra da član 19. stav (1) predmetnog Pravilnika treba osigurati potpunu sigurnost u snabdjevanju, kao i jednaka prava kvalifikovanog kupca na tržištu u slučaju prestanka rada ili raskidanja ugovora od strane snabdjevača.

Slijedom navedenoga Konkurencijsko vijeće smatra da je Nacrt Pravilnika o kvalifikovanom kupcu usaglašen sa odredbama Zakona o konkurenciji, te s toga na isti daje pozitivno mišljenje.

S obzirom da ovaj Nacrt Pravilnika predstavlja još uvijek radnu verziju dokumenta, očekujemo, a u skladu sa članom 25. stav (2) Zakona o konkurenciji, da će FERK dostaviti dopunjenu tj. konačnu verziju istog, Konkurencijskom vijeću BiH na konačno mišljenje.

**Predsjednik**

**Gordan Raspuđić**

**Dostavljeno:**

- **Regulatorna komisija za električnu energiju u Federaciji Bosne i Hercegovine**
- **Arhiv Konkurencijskog vijeća**